

VÖRTELL MISCH ENS JETT

Duer et Joar

Verfasser:
Günter Bongartz

Veröffentlichung:
nur mit ausdrücklicher Genehmigung des Verfassers

Vuerelschött.

Em Juni 2016

Hein on Marie, sinn Frau, soate ön öt Wuehnzemmer tosamme on sproake över Det on Dat. Hein hodd de Zeitung all öropp on öronjer jeläese. Her simulierde so vör sich hin. Höt em Marie nöt wocker jemäck, so wüer her jlatt enjeschloape. „Hein, hürsde dat nöt, ich huer öt Trömmelke on enn Flöet, hüers du dat nöt?“ „Wie, wat, wat ös loss“, brummdde Hein vör sich hin. „Nou komm, stell dich nöt e sue aan, du bös doch noch kenne alde Mann, bewäesch dich enns jett“. Der Tuen von Marie word all jett lauter. De Musik koam ömmer nörder. „Hein, komm lott os ens an öt Fenster joan, bald kann man die Musikmännkes all siehn; kiek enns wie nett, twie Flöetemännkes on twie Trömmelkes“. Möt Marschmusik trooke die veier Musikmännkes an öt Huus vörbee. Doahenjer jinj enne Jonj, der enne hölzerne Vuerel op enne Knöppel drooch. Kott doanoach jinje möt enne jehüerije Abstand öm Jleichschritt die drie Männ von der Vorstand. Dann trottelte wiehere Männ möt der schwatte Anzoch, öm alle Bekannde enne jooe Daach to wönsche. E paar von denne hodde all Probleme möt dr Jleichschritt. Loar dat an die kleen Füsselkes? Marie kiek sich die Männ genau aan. „Hein, kiek enns, der Pitter, dinne Frönk, jeeht möt sinn bald 80 Joar och möt, welsde nöt och möt joan? „Marie, wo denksde hin, ich bön doch kenne Nellbeck mieh on en mie Alder tröck öt mich nöt mieh soe siehr doanoach“. „Hein, du dinjs mich enne jruute Jefalle, wenn du och möt jinjs. Dr Anzoch hab ich dich all örruut jeleit on dat wette Hemp ligg all parat“. „Joar Marie, ich donn dich der Jefalle, ävver denk nöt, dat ich op der Vuerel scheidet“. Marie seit nix. Oahne völl Möeh hodd Hein bald der Zoch enjehold. Kee Wonjer, her woar joa noch nöeter. Emmer mieh Männ schloate sich der Zoch aan. Fraues on Mädches ware nöt tojeloate. Op enns hüerde die Musik opp. Enne von die Männ, der sich vör besonjersch wichtich vörkoam, heel möt enne Befehlston der Zoch aan on lösde der Zoch opp, nöt om vörher doadropp hin towiese, dat doch Vuerel jeschoate wird. E halv Stöndsche hött jedder noch Tiet, Tiet vör noch e paar Bierkes odder Schnäppskes to drenke. Die Tiet vörjinj völl to schnell.

Beem veerde Bier finje de Flöetemännkes on die Trömmelkes wör aan, die Männ opp der Vuerelschött hin towiese “. „Wie, öss öt all so wiet“, komm lott oss jonn. Möt wichtijer Stemm heel der Präsident enn Anspraach, om am Schluss an all to appelliere möt de Satz „Pief Paaf, der Vuerel mott örav“.

„Hein“, sätt Pitter, „Jevv öt all enne, der der Vuerel scheete well“? „Ich weet öt nöt“, joav Hein toröck. „Öt ös och nöt so einfach, wenn du der Vuerel afjeschoate hass, mossde all wiete, wer dinn twie Mnister send“. „No, dat weet ich.

Dr Präsident durfte dr ierschte Schött duen. Der hölzere Vuerel schöddelte sich ke bisske.

Mann vör Mann joav enne Schött av. Manche hant dr Vuerel och jepack, anjere hant bewoss doanever jeschoate odder der Vuerel ja nöt jesiehn.

„Hein, du böss draan“, reep jiemes möt lauter Stemm. „Joa“, deit Hein, „wenn öt dann sein mott“. Von enn Scheete hodd Hein wenich Ahnung. Der Scheetmeister zielde on Hein bruggde bloos an der Afzoch to trecke. Paaf, knallde öt wie be die anjere Schütze. Hein hodd so joot jeschoate, dat dem Vuerel der lenke Flüejel affeel.

Enn halv Stond word all op dat ärme Vuerel jeschoate. Öt dinj sich nix. Ennije hodde all möt dem Scheete opjehüert. „Hein, wöllsde nöt möt der Palaver e Enj maake“.

„Joa, dat möet ich waahl, maar ich habe doch kenn Minister“. „Doa kömmere wör oss all drömm. He has'de noch e Bierke on e Schnäpske, on dat jeht alles wie von selv“.

„Wie solle wör e Schützefees fiere ohne enne Könnij, dat sühst du doch enn. Hald enns richtisch dropp. Dr Vuerel mott jett locker werde. Der fällt noch lanj nöt“.

Hein noahm die Flent, der Scheetmeister zielde, Hein trook av on - paav, wor der Vuerel onje. „Bravo“, reepe all. De Musik finj an to spieele. Möt Tromm on Fööt jinj öt op heem aan. „Hein“ sätt Marie, „Wat hast du jemäck“?

„No Marie“, lallde Hein, Dat well ich dich enns saare, hüet Oavend kannst due beei enne Könninj schloape“.